

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA IULAI 2026

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

AMATA LE 'AFA LONA LUA O LE 2026

Malo le folau, malo le malaga manuia i le paia maualuga o le EFKS i ona tulaga faalupe; malo le faamalolosi ma faatuatua i le Alii Ta'ita'i malaga, o Iesu Keriso le Ao o le Ekalesia. Viia Lona alofa ua tatou aulia manuia le 'afa lona lua o lenei tausaga 2026, e amata atu i lenei masina lona 7 o Iulai. O le tele o taaloga e ta lona malologa ina ua uma le ulua'i 'afa; o le taimi e mapu teisi, toe iloilo ma toe fuata'i ni lape, vaega sa faaletonu ina ia faalelei, ma faalelei atili tulaga sa manuia lona faatinoga - i le osofa'i, le puiptui, ma le amio pulea i luga o le malae. E faapena le uiga faalemafaufau o loo i totonu o le masina lona fitu lenei o Iulai. Ina ia toe silasila i le ala na tatou amata mai ai ia Ianuari e oo mai ia Iuni, ma toe iloilo pe na faapefea la tatou molimau, le tautua ma le soifua osi taulaga i tiute ua valaauina ai. Aemaise le soifua mafuta ma le Alii Faaola lo tatou Atua, le mafutaga lilo vavalalata ma Ia.

O lea ua uma le a'ea o mauga i lona vaega muamua o le tausaga, ua ifo le tuamafa fili malae; mata o le a se'e lili'a le soifua tautua ma le ola auauna i le Atua, e taualuga i le soifua faitaulaga e masani ai - Taulaga o le Tala Lelei, Taulaga Samoa, Taulaga Au Leoleo ma le Au Taumafai. Ua maitauina lava ma le agaga faafetai i le Atua, le si'isi'i pea i luga o faiga taulaga i lona aoao tetele ma tuufaatasiga. E talitonu foi le taofi, o le faailoga manino lea, **ua o gatasi le futia** - o le faula'i o le oloa sasa'a mai e le Atua, e tali mai ai i lau foa'i o isi tausaga ua mavae; **ma le umele** - o lou lagona fiafia ma le olioli e toe ofoina atu ai mo le Atua e ana le oloa. Alo ane ia, i le 'afa lona lua o le tausinioga faalefaatuatua o lenei tausaga. Ia a'e malo lau faatamasoaliiga e ala i faiga taulaga o le 2026, fai mona viiga. **Faatonu Sulu Samoa**

FILIFILIGA FAITOATASI A LE ATUA

"18 O lenei, e lē mai lē ua mana'o, e lē mai lē ua tausinio, a e mai le Atua o lē alofa mai."

Roma 9:1-18

E le'i fausia Roma i se aso e tasi. O le muagagana lea e faasino i se galuega, e tulaga ese le maoa'e ma lona matagofie i ona itu uma; o le upu e faavae mai le tulaga ofoofogia o le aai o Roma, a o aveia ma malo na pulea le lalolagi i ia ona po. O le fausiga o auala mo fesootaiga, o ona maota ma atina'e, o lana fitafita ma vaega'au, e oo lava i lana faamasinoga ma pulega faalemalalo. E lē faatauvaa se taimi na fuafua ma faatino ai, aemaise le atamai, le agavaa ma le talenia, na mamanu ai. Pau o lea, ua mavae atu le Roma tuai lona, le Roma faalelalolagi; ua na o toega o fai nei ma mataaga.

A o le muagagana lenei e fetui lelei, e faamatala ai le Tusi lenei a Paulo i le ekalesia i Roma; ***E le'i fausia le Tusi ia Roma, i se aso e tasi;*** i le tulaga ese ma le maoa'e o ona mataupu silisili ma a'oa'oga faaleagaga, faasino i le alofa tunoa o le Atua ia Iesu Keriso, ua faaolaina, ma ta'uamiotonuina ai le tagata i le faatuatua. Le Roma fou ma le Roma moni lea, o afioga paia a le Atua e lē mavae e faavavau.

O le mataupu o lenei faitauga, **Filifiliga Faitoatasi a le Atua**, e faasino i le filifiliga a le Atua, i tagata e agavaa mo le faaolataga ua Ia saunia. E faasino foi i le aoao tetele o Lana faiga filifiliga faaTolu Tasi Paia, e fai toatasi, e tusa ma Lana pule aoao, e totofi ma valaauina, e tusa aao i ai o Ia, e maua faamanuiaga mai Lona alofa tunoa, ma faataunu ana fuafuaga ***(fa'aauau i le itulau 3)***

O LE FAASINO UPU

1. AMATA GALUEGA ‘AFA LONA LUA	1
2. FILIFILIGA FAITOATASIA LE ATUA	1
3. O LE LAUGA 1	2
4. O LE LAUGA 2	4
5. PEPA MAFUTAGA FALEATA	6
6. NISI I’A MAI LE UPEGA	9
7. ITULAU MO FANAU & TALAVOU	12

O LE LAUGA

Tusi Faitau: Ioane 17: 1 – 26

Matua: Ioane 17: 22, “*O le mamalu foi ua e foi mai ia te a’u, ua ou foi atu ia te i latou, ina ia tasi o i latou, faapei o i ta’ua ua tasi.*”

Manatu Autu: **LALAGO FAATASIE MAMALUAL**

O le tutū faatasi, galulue faatasi, felagolagoma’i ma opogi faatasi i le tino, mafaufau ma le agaga e tasi, o le mamalu fa’aalia lava lea o le Atua, o taoto ai i le Autu filifilia, ma le faamoemoe autu o le tatalo a Iesu i lona Tama o loo i le mataupu atoa lenei e 17 o le Evagelia a Ioane. O loo matuā māioio i lenei tatalo vaega nei e tolu:

(i)(f1 - f5) O lana tatalo mo Ia lava. O lona mautinoa lelei na te lē mafaia se mea pe a aunoa ma le Tama. Seiloga ua tuuina mai ia te ia e lona Tama le mamalu atoatoa sei faataunuu ai ona tiga. “*Lo’u Tama e, ua oo mai le aso. Tuu mai ia le mamalu i lou Atalii.*” O le fesili—O le a le mamalu o loo naunautai e le Alii se’i aumai e lona Tama e tali ai puapuaga? O le malosi ua i le pule a le Tama. Le Pule a le Tama na te pulea ai soo se malosi o le lalolagi. Le malosi se’i faatoilalo le pule a le tagata, ma ia latou iloa le Atua moni e toatasi, ma lē ua Ia auina mai.

(ii) (f6-f19) O lana tatalo e talosia ai lona au soo. O loo matuā manino ai le faamoemoe o le Alii e ao ona faamausalī. O i latou ua foiaina mo le Alii ma le

faamoemoe ia latou tausia ana Afioa, ia latou talia ma ia iloa, o Ia lava o le Alii na auina mai le Atua.

(iii) (f20 - f26) O loo matuā ta mau ai e le Alii i lana tatalo i latou uma o ē talia ma faatuatua e ala i le galuega a le au soo. O le vaega tonu lenei o loo taoto ai le tulituliloa a le Alii o loo faamamafaina i le Manatu Autu. O le talosia a le Alii i lana tatalo o e ua faaekalesiaina ma talia le Upu folafola a le au soo. Pei lava ona amata mai le amataga, e tulimata’i pea e le Alii le mamalu e toina mai lona Tama e mafaia ai mea uma. Lea foi la e talosia i le vaega mulimuli lenei. O lona pulunaunauina o le mamalu o le Atua e ao ona taitaiina ai le au faatuatua ma le ekalesia, aemaise e fa’aauai ai le Feau Talai a le Alii Faaola. Le mamalu fai mai Iesu, “*ina ia tasi i latou uma – faapei o oe le Tama o i totonu ia te a’u, o a’u foi o i totonu ia te oe, ia tasi i latou i totonu ia te i ta’ua.*”

Ua aumai e Iesu le faatusa lea o i la’ua ma lona Tama se’i fai ma alāfua e faataoto ai le ala mo e talitonu ma faatuatua ia te Ia. Faapei ona tasi o Ia ma lona Tama, e ao foi ona faapea o ē uma e talia o Ia. O le manino atili ai foi lea o loo ia matuā finagalo i ai, e le gata e faailoa atili mai mo ia, a ia sili ona avea ma fa’aaliga o le mamalu o le Atua e maopoopo ma tuufaatasia ai ē talia o Ia. Fai mai Iesu i upu filifilia o le matua, “*O le mamalu foi ua e foi mai ia te au, ua ou foi atu ia te i latou, ina ia tasi ai o i latou.*” I le f.23: “*O au o i totonu ia te i latou, o oe foi o i totonu ia te au, ina ia fa’aatoatoaina i latou ia tasi.*” O lona finagalo naunautai lava lea, ia tasi ma faatasitasi i latou ua talia o Ia. “*24 Lo’u Tama e, o lo’u loto lenei ia te i latou ua e foa’iina mai ia te au, ina ia latou faatasi ma a’u i le mea ou te i ai a’u.*”

Ioe, le Ekalesia e, ua faapea foi se toe faamanatu ma se toe fagufagu mai a le Tala Lelei mo i tatou uma o Lana Ekalesia faatuatua. O le Lalago Faatasi e mamalu ai. O le mamalu foi o le fa’aaliga o le mafuta faatasi ia Keriso. E tasi lo tatou valaauina, e tasi lo tatou papatisoga, e tasi foi lo tatou faatuatuaga. Ia lalago faatasi e pei o le igoaipu a Sa Tupuā tatou te malolosi ai. E faasilisili lava i lenei tatalo a le Alii Faaola le soifua ma le mafuta faatasi o ē talia ma faatuatua ia te Ia. E faapena foi se tulituliloa mo tagata o lana Ekalesia. E i ai taimi souā e lu’itauina ai tatou, a e tatou te tatalo faatasi foi i lenei tatalo a le Alii Faaola, Tuu mai ia le mamalu ma le pule mamana a le Atua, na te faatoilaloina ai malosi eseese o lenei lalolagi,

ina ia tasi ai pea i tatou. Faafetai tele le galulue, malo tausī mamalu i le Ekalesia a Keriso. Ia saga faamamaluina pea e le Atua i lona mana fai vavega le faiva folafola o le Tala Lelei.

O Iesu Keriso, o Ia lava o le mamalu silisili o le Atua. O lona afio mai i le lalolagi, malīu ma toetu, ina ia tatou i ai faatasi ma Ia i lona mamalu e faavavau, pe a tatou tutumau i le faatuatua ia te Ia. Ia i le Atua potō e toatasi le viiga ma le mamalu e faavavau. Amene.

Saunia susuga Piilua Sao Fereti FS
EFKS Lepuiāi, Manono
Matagaluega AANA

FILIFILIGA FAITOATASI a le ATUA
(mai le itulau 1)

faataatitia; o Lana filifiliga e fai saoloto, e tusa ma Lona finagalo paia, aunoa se aiāina i se amio ua tonu ma lelei, ma ni agavaa o le tagata. E pule toatasi lava Ia. ***E lē mai lē ua mana’o, e lē mai lē ua tausinio, a e mai le Atua, o Lē alofa mai.***

O le tali masani faigofie lea, i nisi o fesili faigata o le Tusi Paia: E pei o fesili – Aisea na filifilia ai e le Atua, le nuu o Isaraelu e fai mona tofi? Le filifiliga lea o loo auiliili e le aposetolo, *“o sa Isaraelū i latou, o tamafai i latou, ua i ai foi le mamalu, ma feagaiga, ma sauniga o le tulafono, ma le tapuaiga, ma upu na folafolaina; ⁵o ia te i latou tupuga, mai ia te i latou foi le Keriso i la le tino, o lē pule aoao ia, o le Atua e viia e faavavau.”*

A e a Aikupito poo Papelonia, o nuu e sili atu ona malolosi ma popoto, e sili atu ona lafulemu ona laufanua, ma tele ona tamaoiga? Ae aisea Isaraelu? O le tali lea – O le pule ma le filifiliga fai toatasi a le Atua. Pe ona o lona ausage faatusa i isi malo malolosi, lona faatauvaa e faailoa ai le mana ma le silisilisi ese o le Atua, pe ona o nisi mafuaaga e tusa ma Lana silasila mamao ma le silafaga paia, pe o nisi mafuaaga e manatu ai le au su’esu’e, a e tasi lava lona faavae mautinoa, o le faitalia faitoatasi a le Atua na fai ai.

E faapea foi le fesili faasino i le aposetolo ma lona valaauina. Aisea lava na toe tofia ai Saulo, o le faresaio ma’ema’eā na sauā i le ekalesia, e fai ma aposetolo i nuu ese, a ua uma ona filifilia e Iesu ona soo sa tapena lelei i le 3 tausaga? O lona foi le tali. E i ai agavaa o le aposetolo – o le Isaraelu i la le tino, o le sitiseni o Roma, sa a’oa’oina ma tautala

faaEleni. Peita’i, e lē o agavaa ia na filifilia ai, a o le tofiga faapitoa na finagalo ai le Atua. O Paulo lava ia o loo ia molimau, *“A o le Atua o Le na filifilia a’u talu ina fanau mai o a’u, ma valaauina a’u i lona alofa tunoa.” Kalatia 1:15.*

E tele auala sa fai ai filifiliga a Isaraelu. O totonu lava ia o aiga, o le ulumatua o ia e ave i ai le pule, le faamuamua, o le alii o aiga, o le ositaulaga, pe a malīu le tamā. Sa i ai le Urima ma le Tumema, o maa taua sa i le ufifatafata o le ositaulaga sili, o maa tāua e faia ai le faamasinoga ma faiga filifiliga. Sa fa’aaoga foi la’ei ma laau ma isi meafaitino ua faailogaina, e fai ai le vili, poo le se’i, e saili ai tofiga. E pei o le vili e filifili ai le ‘oti e fasia e osi ai le taulaga mo agasala, ma le ‘oti e faae’e i ai agasala ma tuli i le vao, i le aso o le togiola. O nei auala eseese, ua latou talitonu, o loo pulea ma faatonutonu, e le Atua e pule aoao. E pei ona molimau le Faataoto, *“E faia le vili i le fatafata o le ofu; a e mai le Alii lona faatonuga uma lava.” Faataoto 16:33.*

“Filifiliga fai toatasi”. O le upu **fai toatasi** e atagia ai se Atua e sauā ma faapito. Peitai e manino upu o le matua, ***e mai le Atua o Le alofa mai.*** O Lana filiga faavae i lona alofa tunoa, ua maua ai e le tagata agasala le avanoa, e filifili saoloto ai, e talia pe teena le faaolataga, o tofiga ma faamanuiaga ua tatala mai. Ua si’i e le aposetolo se matalalaga, o loo mamanu ai le faiga lea, i lona faapea mai, ***“O tagata mai ia Isaraelu, e lē o Isaraelu i latou uma lava.”***

Ua ta’ua e fai ma pine faamau o lenei matalalaga, tofiga e amata mai le aiga ma le fanau a Aperamo; e matua Isamaeli, o le atalii i la le tino lea, o le mana’o o Aperamo ma Sara, e ala ia Akara le fafine ese. A o Isaako le atalii lona lua, o le atalii lea na folafolaina e le Atua lona fanau mai, o le suli moni na filifilia, e tupuga mai ai le fanauga a Isaraelu. E sosolo ai foi le fanau a Isaako – e muamua le ulumatua o Esau, ae na toe faalēaogaina lona tofi, ona o lona lava faatalalē i mea paia a e faatāua le ‘ai e tasi – ma maua ai le faamanuiaga ma le tofiga, e le lona lua, o Iakopo lea. E faapea lava i le tuufaasolo mai, o le gafa filifilia o le Mesia; na filifilia Iuta, a e lē o Reupena, Simeona ma Levi e matutua. Tuu mai le fanau a Iuta ma Tamara, e ui ina sa faailoga le vae o Sera i le ‘ie mūmū, e iloa gofie ai lona ulumatua, a e faate’ia le fanau muamua mai o Faresa, o ia lona na

(fa’auau itulau 8.)

O LE LAUGA (2)

(Na amata ai le Mafutaga Matagaluega Faleata)

Tusi Faitau (IBRA): Roma 9:19-33

Matua: Roma 9: 30, 31, 32a

“O lenei, se a ea sa tatou upu? Ua maua le amiotonu e nuu ese na latou le saili i le amiotonu, o le amiotonu lava lea e maua i le faatuatua. A o Isaraelu na saili i le tulafono o le amiotonu, e lei oo i latou i le amiotonu. Ona o le a? Ona ua le sailia i le faatuatua, a e peisea o galuega o le tulafono;”

Manatu Autu: “O le lē talitonu o Isaraelu” (“*Israel’s unbelief*”)

Introduction

Ua manino ma malamalama le talafaasolopito o le Atua ma lona filifilia ai o Isaraelu e avea ma ona nuu. Na ia osi ai le feagaiga, ma avea ai ana folafolaga ma pine o lea feagaiga. Le feagaiga na ia osia e fai ai o la ma Atua ia Isaraelu, ae fai Isaraelu ma ona nuu, ma le faamoemoe ia tausi lea feagaiga e ala i tulafono ua faataoto mai ai lona finagalo. Ma avea ai le tulafono ma fua taualuga o le ola o soo se tagata Isaraelu, ina ua o latou manatu o le tulafono o lo latou ala lea i le ola faavavau.

Ae paga lea, na oo a i le tulafono e le’i mafai ona latou tausi, e lei gafatia ona o latou tauave le feagaiga na osi ma le Atua. Ua tupu le agasala ma le solitulafono o le nuu, ma oo ai i puapuaga e tele, e pei ona iai le tafeaga ma le faatafunaina o Ierusalema. Na tuuina atu lea e le Atua i latou i lima o malo faapaupau sei aoai ma toe fotuai lo latou ola i le Atua. Peita’i e tumau lava le ola le usitai o le nuu, ma ua faaaauu ona soli le feagaiga na osi ma le Atua. Ua alu alu suaga o le vaatele ua valoia ai e Isaia le oo mai o le Mesia, o le Keriso e na te toe faatulaga le pogisa o tagata i le Atua, ina ia maua e i latou le faaolataga. Paga lea, e lei talia lava e tagata Isaraelu, ona o le lē talitonu. O lo latou le talitonu lea, na afua ai lava ona mapo i le tulafono e saili ai le amiotonu, a e teena Iesu o lē na taunuu ai le tulafono.

NT: Roma 9:19-33

O le tusi na faitauina nei, o lo o faapupula ai e Paulo le uiga moni o le tauamiotonuina i le faatuatua. (Justification by faith). Manatu le toatele o le au

suesue, o le tusi lenei a Paulo na iloga ai lana finauga i le uiga moni o le faatuatua e maua ai e soo tagata le faaolataga na faia e Iesu Keriso. Ma e foliga mai ai, o le afuaga foi lea ua faamuamua ai le tusi lenei a Paulo i ana tusi uma ina ua faakanonaina le Feagaiga Fou. Fai mai a o i ai Paulo i Korinito i lana malaga faamisionare lona tolu, ma ua tapena e toe foi i Ierusalema, na oo ai le tala ia Paulo i le tele o tala’iga taufaasese a nisi o tagata Iutaia, ua ta’ua foi o tagata Kerisiano Iutaia. Ua latou taumafai ai e lauga le tulafono i tagata o le ekalesia i lo talitonu faa-Isaraelu, e na o le tulafono lava e ta’uamiotonuina ai soo se tagata. Peitai, na logotala loa le Aposetolo tusi loa le tusi lenei, na ia faapupula i ai ata atoa o le feagaiga a le Atua ma le nuu o Isaraelu ma le agavaa ai o tagata o nuu ese lea e i ai ma Roma i le faaolataga ma le tauamiotonuina. Lea e i ai upu ua fai ma o tatou matua i lenei taeao.

I le mataupu e 9, e lima vaega ua vaevaeina i ai e le Aposetolo le tau faamalamalamaina o le lē toe agavaa ai o le tulafono i le sailiga o le amiotonu. Vaega 1, mai le fuaiupu 1-5... ua faailoa ai e Paulo i tagata Roma lona tigā alofa i ona uso ma lona aiga, o tagata Isaraelu i latou, na faamanuia i ai le Atua, ma ua to i ai lona mamalu, le feagaiga na osi, ma le tulafono na ogatotonu i ai lo latou ola tapuai, a e le gata i lea, o le tupu mai ai ia te i latou le faaolataga mo le lalolagi atoa, o Iesu Keriso lea.

Vaega e 2 mai le fuaiupu 6-13, na faamanino ai e Paulo, e le’i i’u vale folafolaga a le Atua ia Isaraelu. O lana filifiliga foi e faataunuu lona finagalo e le’i fua i ni amioga a Isaraelu, ae na fai lava i lana pule faitoatasi. Vaega lona 3 mai le fuaiupu 14-18, na faailoa ai le amiotonu a le Atua i lana filifiliga o Isaraelu. Vaega lona 4 lea e i ai le amataga o le faitauga i lenei taeao, mai le fuaiupu e 19-29, Ua tali ai Paulo i se fesili e foliga o ni manatu ia o tagata Roma. Le fesili fai mai, Afai la e le tetee atu se tasi i le finagalo o le Atua, pe se a le mea e aoai mai ai pea ia?

Ua tali ai le Aposetolo e fai ai le Fai ipu omea ma le ipu omea ma faataitaiga. O le Fai ipu omea e i ai le pule e fau ai lana ipu omea i le ata ma foliga e finagalo ia i ai. Pe tasi a le paluga omea e fau ai ituaiga ipu e lua, o le ipu o mea lelei ma le ipu o mea faatauva. O le ata o le Atua foafoa ma lana tagata na fai, e tasi a le fausaga o tagata a e na tuu esee ina ua filifili e le Atua Isaraelu e faailoa ai lona silisili ese ma lana pule

aoao. Paga lea ua finagalo lava le Atua e au lona alofa i tagata o nuu ese, e sa le'i avea ma ona nuu a ua fai lava ma ona nuu. Le valoaga lea a Hosea na toe faatepa i ai e Paulo tagata Roma, i le uiga moni o le pule alofa ma le amiotonu a le Atua e ala ia Iesu Keriso ma le faaolataga na ia faia. A o le vaega mulimuli lea e i ai le matua o lenei taeao, ua faailoa manino ai e Paulo i tagata Roma, e tasi a le ala latou te maua ai le amiotonu, o le FAATUATUA.

Latou te le tau saili se amiotonu i le tulafono e pei ona taumafai atu ai tagata Iutaia. Lea lava na ia ta'ua, se a ea sa tatou upu? Ua maua le amiotonu e nuu ese na latou le saili i le amiotonu, o le amiotonu lava lea e maua i le faatuatua. A o Isaraelu na saili i le tulafono o le amiotonu, e le'i oo i latou i le tulafono o le amiotonu. Ona o le a ea? Ona ua le saili i le faatuatua, a e peisea'i o galuega a le tulafono. O le a le uiga lea mea? Mo Paulo lava ia, ua uma ona faataunu e Iesu le tulafono e tusa ma ana upu, uma ona faatino e Iesu le amiotonu e tusa ma le finagalo o le Atua. O le a la seisi mea e toe moomia e tagata o nuu ese ma tagata uma? Ua leai a seisi mea ua taunuua ma e ona faia e Iesu le galuega. A e pau lava le ala e ta'u amiotonuina le tagata, o le faatuatua faamaoni ia Iesu Keriso.

Na faaiu a upu a le Aposetolo i tagata Roma i le valoaga a Isaia na ia faapea ai *“Faauta ou te tuu i Siona le ma'a e tausuai ai, ma le papa e tautevateva ai; e le mā foi se tasi e faatuatua ia te ia.”* O le ata lea o le Kereso na afio mai i Ierusalema, ma ua avea ma maa e tausuai ma papa e tautevateva ai le tagata Isaraelu ua lē talitonu ia te ia, a e faaeaina ai le tagata faatuatua.

Application

Le paia e o le tatou Mafutaga i lenei taeao, o se fafagu foi lea a le Tala Lelei mo i tatou uma. O le ola lē talitonu o Isaraelu, ua fai ma faamanatu sili mo i tatou, ina ia saga tupu pea lo tatou faatuatua e ta'u amiotonuina ai i tatou uma i luma o le Atua. Tatou te lē tau saili i galuega a le tulafono e ta'u amiotonuina ai i tatou. Lea lava ua faamanino e Paulo i le ekalesia i Roma, ua maua le amiotonu o nuu ese ona o le faatuatua. A o Isaraelu na saili i le amiotonu a e latou te le'i maua, ona o le naunau e faamalie le tulafono. A fua la i le ata atoa o lo o ta'ui ai lenei feau, o le ata o le Alofa Mutimutivale o le Atua. Le alofa tunoa lava lea o le Atua ua taunuua ai lana feagaiga ma ua

tatala ai lona alofa i tagata uma e ala i le faaolataga na faia e Iesu Keriso. E le o le manatu o Paulo e leaga le tulafono, pe lē tāua foi galuega i lo le faatuatua. Ao le tagata e muamua i luma lona faatuatua ae mulimuli atu i ai ana galuega ma lana auunaga. O le tagata e lē fua ana faatino i se faatonuga, pe faapea foi seiloga o le tulafono ona faatino lea o se galuega alofa. Ao le tagata faatuatua ua ia lagona le alofa faakeriso, e lē tau faasino maia e se tulafono le mea e tatau ona fai. Ae ua faatino ona o le faatuatua ma le ola talitonu ia Iesu Keriso. E iai le talitonuga, o lo tatou auai mai ai i lenei faamoemoe, o le taitaiga lava a le Agaga o le Atua.

Ua lagona e le tagata le talitonu ma le faatuatua, le tāua ma le tamaoaiga o lenei mafutaga e saga tapu'e ai pea le soifua faaleagaga, lea ua afua ai ona faamalolosi ma faamaloulou mai le paia o le tatou matagaluega i lenei aso. O le ata o le tagata ua tauamiotonuina i le faatuatua, ina ua filigā e ala i le galuega faasoa i mataupu faaleagaga atoa ma le faatamaoigaina o le mafaufau ina ia ola ma soifua maloloina lelei. O le tatalo a le Tala Lelei, ia faaauu pea ona ta'imua lo tatou faatuatua i le ta auauna ma tautua, ma ia avea pea le faatuatua ma auupega e tau ai i le faasagatau mai o aoaoga taufaasese ma le malosio o suiga o le poto ma le filosofia ua taumafai ai e faapumoomoo lo tatou vaai i le Iesu ma lana faaolataga na fai. O le Atua lava e au ma i tatou, pe a o tatou tutumau i le faatuatua, a e lē 'au le tulafono ma i tatou. E laveaina i tatou e le alofa tunoa o le Atua, a e lē laveaina i tatou e le tulafono

Kerygma

O Iesu Keriso lava ia, na iloaitino ai le amiotonu a le Atua ma lana pule alofa. O ia lava le ata manino o le tagata faatuatua na ia tauave lava ona tiga ma amo faatasi ma agasala a le lalolagi atoa, ma iu ai i lona maliu tiga i le satauro. O lona toe soifua manumalo mai ai i le oti ma le tuugamau, na alalaga ai le lalolagi i le olioli, ina ua saofaga tagata uma i le ola faavavau, e ala i le faatuatua ia te ia. Ia tumau i le Atua alofa le viiga uma lava, nei seia oo i le faavavau. Amene.

Saunia susuga Makesi Aiva AM
Vaega o Faamatalaga Tekonolosi
Ofisa Tutotonu EFKS
EFKS Vailoa-tai, FALEATA.

PEPA MAFUTAGA MATAGALUEGA FALEATA – 2026

FOLASAGA: “Fausiaina o Aiga ma Nuu Mautu e ala i le Fa’atuatua!”
(Building Resilient Families and Communities Through Faith!)

UPU FAAFEILOAI

Malo le soifua manuia ma le lagi e mama. O se taumafaiga lenei i le pepa ua tapenaina e tusa ai ma folasaga ua fa’aautu i ai la tatou Mafutaga i lenei tausaga. E tolu ni vaega taua ua auga i ai lenei Pepa, ma ua mulimulitai lava i manatu taiala ua faataoto mai.

VAEGA 1

“Fausiaina o Aiga ma Nuu Mautu e ala i le Fa’atuatua!” (Building Resilient Families and Communities Through Faith!).

O le tulaga muamua e fia agai i ai se manatu, o le fia faatauaina o le upu faatuatua o loo i ai i le faaupuga lenei. O le upu faatuatua i le gagana Eleni (pistis, πίστις), o lona uiga faigofie o le talitonu (believe). A e i le tusi o Eperu o loo faamatalaina ai le faatuatua e faapea: “*A o le faatuatua o le faalagolago lea i mea ua faamoemoe i ai, o le mautinoa lea o mea e le o vaaia.*” Eperu 11:1 : (“*Now faith is confidence in what we hope for and assurance about what we do not see.*” NIV).

E mafai ona toe faaupuina le mau a le tusi o Eperu e faapea; o se fuafuaga poo se faamoemoe e lei tino mai, a ua iai le talitonuga e mautinoa e tupu ma taunuu. A fua la i ai i le folasaga lenei: “Fausiaina o Aiga ma Nuu Mautu e ala i le Fa’atuatua, lona uiga, e le mafai lava ona taunuu lea manulauti pe a le i ai muamua so tatou faatuatua, tatou te talitonu ai e mafai ona faataunuaina ma tino mai.

Lona lua o vaega taua i le folasaga lenei, o aiga ma nuu. Manatu ua tatou molimauina uma lava mai le Afioga Paia a le Atua, o le aiga na amatamea ai le Atua i le amataga, pei ona ia faamanuia ai ia Atamu ma Eva, ina ia fanafanau ma uluola, ma ia tumu ai le lalolagi, ma tuuina atu i ai le pule i mea uma o i ai i le fogaeleele (Kenese 1:28). E le fesiligia foi le tulaga ua tatou silafia uma lava, e le mafai ona maua ni nuu pe a leai ni aiga. Aua o aiga e fausia mai ai nuu ma afioaga. Afai foi la o aiga e fausia mai ai nuu, e le sese foi la le gagana masani o loo tatou alalaga ai i le

tele o taimi, a lelei aiga, ua lelei foi ma mautu nuu, ae a leaga aiga, ua malepelepe foi nuu. Ona faapea lea o se manatu, a tatou naunau e fausia ni aiga ma ni nuu fealofani, tamaoaiga, maopoopo, ma mautu, e tataua ona amata i le i ai o lo tatou faatuatua ma le talitonu atoatoa, e mafai ona tatou faatinoina lea manulauti taua. O lo tatou faatuatua lena e faavae i lo tatou talitonuga faakerisiano, i lo tatou Alii o Iesu Keriso, aua o la o le atoaga o lo tatou faatuatua i mea uma tatou te manatu i ai.

VAEGA 2

Autū (Theme): “Mai le Fa’alauiloa i le Fa’atinoga!”
(From Awareness to Action!).

E lua foi ni vaega taua o loo i ai i le faaupuga lenei. Muamua o le faalauiloa (awareness); lona lua o faatinoga (actions). Manatu o lea ua manino le tulaga i le faatuatua e ao ona tatou muai mauaina e mafai ai ona tatou fausia ni aiga ma ni nuu mautu. Ao le mea moni, afai e na o lo tatou pepese ma faalauiloa solo i tagata lo tatou faatuatua lea ua i ai, a e a leai ni a tatou faatinoga, e maumau le taimi. Poo le a foi le tele ma le susua o a tatou faaupuga e faamatala auiliili ai le manaia o le faatuatua, a leai ni faatinoga, ua na o ni faaupuga faatiga taliga i le faalogo a tagata. E pei a o upu ua tatou masani ai, “e leo tele galuega nai lo upu ma tala”. O loo a’oa’o manino mai foi le Tusi Paia i le vaega lena pei ona fai mai le Aposetolo o Iakopo: “*E faapea foi le faatuatua, pe afai e le i ai galuega, e mate lava ia ina ua na o ia.*” Iakopo 2:7 (“*In the same way, faith by itself, if it is not accompanied by action, is dead.*” NIV) Atonu la ua tau vavala mai le aano o le folasaga lea “**Mai le Fa’alauiloa i le Fa’atinoga!” (From Awareness to Action!)**, e matuai alagataua lava ona o gatasi la tatou lauga i le faatuatua, ma a tatou galuega e faamaonia ai le moni o lo tatou faatuatua.

VAEGA 3.

Fesili Autū (Key Question):

“O a ni la’asaga aogā e mafai ona faia e Ekalesia, e si’itia ai le soifua manuia fa’ale-mafaufau i totonu o latou nu’u?” (What practical steps can churches take to promote mental wellbeing in their communities?)

E manatu o le taliina o le fesili lenei, poo a ni laasaga e mafai ona faatino e Ekalesia e siitia ai le soifua manuia fa'ale-maufaufau i totonu o o latou nu'u, o loo taoto ai le feau laualuga o le nei pepa. E i ai foi le lagona, o faatinoga (actions) e pei ona tau faailo atu i le vaega lona lua o le pepa, o laasaga lava ia e manaomia ona faatino e Ekalesia. Ona la o le fesili o loo agai tonu i le Ekalesia, a o le Ekalesia o lana anavatau o le itu faaleagaga, o lea e fia aumai ai se fuaitau mai le Tusi Paia e amata ai le taliina o le fesili. O le tima'i a le aposetolo o Paulo i le Ekalesia i Roma e faapea: “*Aua foi tou te amio faatasi ma lenei lalolagi, a e peitai ia liliuina i le toe fauataiina o outou loto, ina ia outou su'esu'e pe se a le finagalo o le Atua, o mea ua lelei, ma le malie, ma le atoatoa.*” Roma 12:2 (“Do not conform to the pattern of this world, but be transformed by the renewing of your mind. Then you will be able to test and approve what God's will is—his good, pleasing and perfect will.” NIV) Ua manino mai i le faamalosi a le aposetolo, o le laasaga muamua lava lenei a soo se tagata e tatau ona faatino ina ia maloloina ai lona mafaufau, o le faafou ma tapu'e lona mafaufau i aoaoga faaleagaga e tusa ma Afioaga Paia a le Atua, a e le o mea faalelalolagi. Ae i le vaai i ai i le lotoifale faale-ekalesia, e talitonu le manatu e tele ni laasaga ma ni fuafuaga lelei e mafai ona faatino ma faataunuu e Ekalesia e siitia ai le soifua manuia faalemaufaufau i totonu o afioaga. E le taumate foi o loo i ai le tofa ma le utaga potu i le paia o Ekalesia aemaise le Aufaigaluega a le Atua i afioaga taitasi mo fuafuaga e mafai ona faatino.

A o nisi nei o laasaga ua manatu le faipepa, e fesoasoani i le siitia o le soifua maloloina faale-maufaufau o tagata i totonu o afioaga.

1. Aoaoga/Mafutaga Faaleagaga

➤ Aoga Aso Sa & Aoga Faifeau

Faafailele le vaega muamua o le olaga o le tagata i lona tuputupu a'e i le Afioaga Paia a le Atua

➤ Autalavou

Taimi talavou o le tagata, o se taimi ma'ale'ale o lona olaga e tatau ona matua tapu'e ai i aoaoga faaleagaga.

➤ Mafutaga a Tina & Mafutaga a Tama

E manaomia foi le lava tapena o Tama ma Tina i aoaoga faaleagaga aua le taitaiina o aiga i totonu o nuu.

➤ Aoga Tusi Paia (Malua Bible School)

E taua foi le i ai o ni aoaoga Tusi Paia e aoaoina ai tagata o le sosaiete aemaise nuu ma afioaga.

2. A'oa'oga o le Poto Salalau

➤ A'oga Faata'ita'i

Aoaoina o fanau a le afioaga ina ia atamamai ma lelei mafaufau i le agai atu i le lumanai.

➤ A'oga Tulagalua

O le vaega lona lua o le ola aoaoina o le tagata e tatau foi ona faatauaina.

➤ A'oga Kolisi Mauululuga

Ua oo atu le ola aoaoina i aoga mauululuga, e tatau ona faatino.

➤ A'oga Fa'aauau (Vocational Institutions)

E taua foi le i ai o ni aoaoga fa'aauau mo nai tamaiti ua le ausia tulaga i lunivesite ma isi laasaga mauuluga o le ola aoaoina.

➤ A'oga Fesoasoani (Tutorials, Study Centres)

E manaomia foi le i ai o ni aoga faaopoopo i nuu ma afiaoga e fesoasoani i fanau pe a mae'a taimi faatulagaina o aoga.

3. Polokalame o Aga Fesootai (Social Activities)

➤ Polokalame Taalo - Tupulaga (Malae Taalo)

Faatino ni mafutaga taalo ma ni taamilosaga e feiloai ai tupulaga

➤ Polokalame Faamalositino (Zumba, Hikings, etc..)

Faatino ni polokalame ina ia tausisia le ola maloloina o le tino aua e tele lona taua mo le maloloina o le mafaufau.

➤ Polokalame Sailiseleni (Bingo, BBCue etc...)

E taua foi taaloga a nai tina o loo faatino i vaiaso taitasi e faagaioi ai o latou mafaufau aua e mafuta ai ma isi tagata o le afioaga.

4. Asiasiga & Fesoasoani (Visitations & Charity Programs)

➤ Foai i Aiga Mafatia

E taua le fesoasoani o Ekalesia i nai aiga o manaomia le fesoasoani aemaise i taimi o puapuaga ma mafatiaga tutupu faafuasei.

➤ **Foai mo Tagata Mama'i (Aiga & Falema'i).**

E taua foi le asia o nai tagata mama'i o le afioaga aemaise nai matua taus.

Manatu e pei lava ina muai faailo atu, e le taumate le tele o nisi o laasaga taua e mafai ona faatino e Ekalesia aua le siitia ai o le soifua manuia fa'alemafaufau i totonu o afioaga. A matau foi i ai i vaega ua folasia atu i le pepa, o le tele lava o vaega o loo faatino e le tele o tatou Ekalesia. A e maua luga le lagona, o loo i ai foi le faataga mamao i le paia i Ekalesia aemaise le aufaigaluega tofifi a le Atua i afioaga, e faamaite ai nisi o laasaga lelei e ese mai i vaega ua faasoa atu i le pepa.

AOTELEGA

E talitonu le manatu tatou te ioeina faatasi le uluai laasaga o lo tatou ola Kerisiano, o le faatuatua. O le faatuatua e maua ai lo tatou malos ma le mautinoa e faataunuu ai soo se auaunaga e fia faatino. E faapena foi se lagona i lo tatou taumafai ai e fausia ni aiga ma ni nuu mautu, e le mafai ona tino mai pe a leai so tatou faatuatua. A o le faatuatua e faavae ma taula i lo tatou Alii o Iesu Keriso.

E le gata i lea, a e maua luga le manatu, ua tatou molimauina faatasi i lo tatou soifua galulue i le galuega a le Atua, afai lava e na ona taulagi o lo tatou faatuatua a e aunoa ma ni faatinoga, ua o se faatuatua lava e mate pei ona molimau mai le Afioga Paia a le Atua. Peitai, a o faatasi a tatou faalauiloa ma tatou galuega faatino, ona lē masalosalo lea o le si'itia ai o le soifua manuia fa'alemafaufau i totonu o nu'u ma afioaga o loo tatou auauna ma tautua ai i le Talalelei a lo tatou Alii. O se taumafaiga vaivai lea a le auauna aua le Mafutaga a le tatou Matagaluega i lenei tausaga. Afai foi ua i ai se gagana ua pā'opapa i la outou maitau mai, faamalulu atu, faamagalalo le auauna.

UPU FAAP'U

Tau ina ia faamanuia tele le Atua i le tatou Matagaluega, lau Susuga le Toeaina Faatonu ma le Faletua, Susuga i Faafeagaiga ma Faletua, le Afioga le Tiakono Toeaina ma le Faletua, Susuga i Tama Penisione ma Faletua, Faifeau ma Faletua, Aoao ma Faletua, Tiakono ma Faletua, ma le loaloa o le tatou Matagaluega ua mafai ona tatou mafuta i le nei aso.

Saunia Rev. Amosa Mikaele FS (FNA)
EFKS Ketesemane Fou Fugalei, FALEATA.

FILIFILIGA FAITOATASI

A LE ATUA
(mai le itulau e 3)

filifilia. Ua maitauina i lenei mamano, fetalai a Iesu, *"A e toatele o e ua muamua e avea ma mulimuli; o e ua mulimuli foi, e avea ma muamua."* Mataio 19:30. E i ai ma isi mau e saga faamautu ai lenei mamano, o le filifilia o le lona lua po o le na mulimuli, nai lē na ulua'i mua i malae. O le fanau a Atamu ma Eva e matua Kaino, a e na silasila le Atua ia Apelu ma lana taulaga. Na muamua foi tofia Saulo le atalii o Kiso e avea ma ulua'i tupu o Isaraelu, mata o le a fa'aauau e lana fanau ma lona aiga lea tofiga mamalu, peitai e leai; o Tavita le atalii lona valu o Iese mai Peteleema, na faafou ai le feagaiga a le aiga tautupu, e fanau mai ai le Alo o le Atua. Na oti foi le ulumatua a Tavita ma Patesepa, a o Solomona le atalii lona lua, na se'e i le nofoalii. A vaai foi i le uluai lalolagi na faia, na faaumatia uma i le lolo, a e toe faia le isi lalolagi o tagata fou, e ala i le to'a valu o Noa ma lona aiga. E oo mai lava ia Iesu Keriso, o loo faalupe e le aposetolo, i lana Tusi lenei ia Roma, o le Atamu lona lua, ua na faia le faaolataga e silisili, ua toe ola ai tagata uma na oti, i le agasala a le Atamu muamua. *"16 A e le pei o le toatasi na agasala le mea e foaifuaina mai; aua o i le agasala e tasi le faasala, e oo ai le sala; a o i le agasala e tele le mea e foaifua mai, ina ia ta'uamiotonuina. 17 Aua afai o le toatasi na malo ai le oti i le agasala a le toatasi, e silisili lava ona malo ma ola e ua maua le faula'i mai o le alofa tunoa, atoa ma le mea alofa o le amiotonu lea, ona o le toatasi, o Iesu Keriso."* Roma 5.

E peisea'i o le feau lea, o loo fia ta'u atu e Paulo ia Roma. O Isaraelu le nuu na ulua'i tofia e le Atua e tusa ma lana faiga filifiliga fai toatasi; o le Isaraelu muamua lena, po o le Isaraelu tuai. A o le Isaraelu lona lua, le Isaraelu fou, o tagata Isaraelu ia ua latou talia ma faatuatua ia Iesu Keriso, faatasi ma tagata o nuu ese uma, e i ai Roma ma Eleni, ua faatuatua ia te Ia. O i latou uma ia ua ta'ua o le atalii ma le nuu lona lua, ua filifilia e le Atua, ua faaolaina, ma ua ta'uamiotonuina i le faatuatua, e ala i Lona alofa tunoa. O i latou sa lē faitaulia, a o lenei ua faamuamua, ua faasilisiliina i le faaolataga. Ua tuufaafegai ma le Isaraelu muamua, le Isaraelu matua, sa faamaua luga ma fia mata muamua o latou o le nuu o le Atua, a ua lafoa'iina lo latou tofi. O se feau o loo tiga tele ai le aposetolo – **(fa'aauau itulau 14...)**

O NISI I'A MAI LE UPEGA

“Au mai ia nisi i'a ua outou maua nei.” Ioane 20:10

O LE PEROFETA USITA'I **A E NA FASIA E LE ATUA:** **SE MISITERIO LĒ FAAMANINO A O LE** **TUSI PAIA?**

O i ai se tala i le Tusi Paia e toatele nisi latou te 'alofia lona laugaina, aemaise i le vaevaeina auiliili o ona vaega taitasi; e lē ona o lona mata'utia i ona foliga vaaia faalemafaufau i mea na tutupu, a e ona o le tulaga fesiligia o sona tali mautū ma le manino lelei, a e peisea'i e faanenefu lona a'oa'oga. O se perofeta na usitai i le Atua. Na ia faia mea uma na faatonuina ai. A e peitai, na fasiotia o ia, i le pule faitoatasi ma le finagalo o le Atua. E leai sona taufaalata, na usitai ma faamaoni, leai se fefe i le pule faatagata, na faia mea uma ma lona loto mama. Peitai na faia lava le faamasinoga ma lona faasalaga. Na faatino ma faataunuu e se manu feai, na la'ua fetau i le ala a o ia toe foi i lona aiga, a o tauaveina pea e le tagata le mamalu o le vavega na ia molimauina talu ai nei. O le tala lea o loo i le **1 Tupu 13**; ma afai e te le'i faitauina atoa e tau i lona i'uga, e manaia foi a e ia faitau muamua lau Tusi Paia.

O le faatomua o loo i tua atu o lenei tala, o le faiga malo a Isaraelu ua vaeluaina; o se tasi o vaitau aupito loulouā o le tala faasolopito o Isaraelu. Ua maliu le tupu o Solomona. O lona atalii o Reopoamo (e masani ona faapuupuu ia Leo), na pule ma le sauā tele, na ala ai ona vavae ese ituaiga e sefulu, ma fausia la latou faigamalo i le itu i matu, faaigoa pea ia Isaraelu, i lalo o le taitaiga a le tagata e igoa ia Ierepoamo (Iele). O le malo i saute, faaigoa ia Iuta, sa tauaveina faaolaola le laina tautupu o le aiga o Tavita mai Ierusalem. O lenei vaeluaga e le na o se tulaga faapolokiki; a o se vaeluaga faalelotu, faaletapuaiga. Na iloa e Ierepoamo afai e saga o ifo pea tagata o lona malo i Ierusalem e tapuai i le malumalu o Solomona, e i'u ina toe faaosofia o latou lagona alolofa i le aiga o Tavita. Ona faia lea e Ierepoamo se faai'uga o le a avea ai lona igoa i totonu o tusitusiga paia, e fai ma faatusa, faaitaitaiga, ma le tino tagata o le tete'e ma foumalo. Na ia fausia ni povi auro se lua, ma tuu o le tasi i Peteli i le itu i saute o lona malo, ma le isi i Tanu i le itu i matu, ma ia fai atu i ona tagata, *“O outou atua nei na latou aumaia outou mai Aikupito.”*

Na ia tofia ositaulaga e lē mai le ituaiga o Levi. Na ia faatuina ana lava tausamiga i aso e ese nai lo aso na faasino mai e le Atua. Na ia faatuina le fata faitaulaga i Peteli ma ia sauni e faatino le osiga taulaga e ia lava, o le tupu ua fai ma ositaulaga, o se agasala ma soliga tulafono fai ma le mautinoa. E tusa o le tausaga 930 TLM, i le taimi tonu lava, a o tula'i Ierepoamo i luma o le fata faitaulaga i Peteli, ua amata ona alu a'e le ausa, ma ua amata le sauniga, na taunuu mai ai le tagata mai Iuta. O loo ta'ua o ia, o le tagata o le Atua. E leai sona igoa. O lona tulaga e lē o se faatamala o le tusitala; o le fuafuaga filifilia lelei. E le afaina lona tulaga po o ai o ia. O le mea e tāua o le tofi o loo ia tauave, o le upu o loo ia aumaia, ma le feau o loo fai o ia ma sui.

E sau o ia mai Iuta, mai le itu i saute, mai le nofoaga o loo faia ai le tapuaiga moni ma le sa'o, ma o lona taunuu mai ua avea ma faalavelave tuusa'o i le sauniga o loo ta'ita'i ai Ierepoamo. E leai ni faatuulima faafeiloai, leai ni faailoa o tofiga ma ofisa faalemalo, leai ni lapataiga. Na faasaga atu le tagata i le fata faitaulaga ma tautala atu se valoaga e le gata ina tulaga ese lona anoa, a o lona patino. O le a fanau mai se atalii i le aiga o Tavita, o se atalii o lona igoa o Iosia, ma o lenei atalii o le a ia susunuina ponaivi o tagata i luga o lenei fata faitaulaga – o ponaivi o ositaulaga o loo latou osia taulaga i ona luga.

O se perofetaga lenei ua i ai le suafa aloaia, o se faatinoga maoti ua patino, ma se nofoaga tonu. Ma e lē o se valoaga e faataunuu i ni tausaga, pe faitau ta'i sefulu tausaga; o le perofetaga e silia ma le tolu senituri faato'a taunuu. O le tupu o Iosia, lea na tupu i Iuta mai le tausaga 640 e oo i le 609 TLM, o le a ia faaleagaina le fata faitaulaga i Peteli ma olopalaina lea nofoaga paia e tusa ma le valoaga a le perofeta (o loo faamauiina i le 2 Tupu 23). Peitai o le tulaga na te taofi mauina le taimi i lenei tala, e lē o le valoaga. A o le mea na tupu mulimuli ane. Ina ua uma ona fai atu le valoaga a le perofeta, ona aapa faaloaloa atu lea o le lima o Ierepoamo mai le fata faitaulaga, ma na faatonuina le saisaia o le perofeta. O le taimi lava lena na malō ai le lima o Ierepoamo ua lē mafai ona toe faafoi mai i tua. Ua māvavae le fata faitaulaga, ua masaa foi le lefulefu sa i luga o le fata, e tusa ma le upu a le perofeta, o le faailoga e faamaonia ai le moni o lana valoaga.

A o malō ai le lima o Ierepoamo, ma ona mata o loo faataupupula atu i le fata faitaulaga ua vaeluaina, ma le lefulefu o masa'a ifo ai, na ia faia le mea e tasi na ia iloa e tatau i lea taimi. Na ia aioi i le perofeta ia tatalo ma faatoga i le Atua ina ia toe faalelei lona lima. Sa faapena ona tatalo le perofeta, ma toe faamaloloina le lima o Ierepoamo. O le loto faafetai o Ierepoamo, ma lona iloa e lē se tagata faatauva'a o loo la fesaga'i, na ia ofo atu ai e tali malo i le tagata. *“Se'i ta o ma a'u i lo'u fale, e te malolo ai, ou te avatua foi ia te oe se meaalofo.”* O le tali a le tagata o le Atua, e faavasegaina ai le tulaga o isi laasaga e mulimuli mai. Na ia fai atu ia Ierepoamo, e leai; ma e tusa lava pe na te avatua le vaeluagalemu o mea o loo i lona fale mo ia, na te lē talia lava le valaau fa'aaloalo; na te lē 'ai, pe inu se vai i lea mea, e tusa ma le afioga a le Atua ia te ia. Ia 'aia foi na te toe foi atu, i le ala na ia sau ai.

E tolu vala o le faasā, manino lelei, tuusa'o aunoa nisi aiaiga. Leai ni tulaga faalelotu pe faatapuaiga, a o faatonuga tuusa'o na tuu i le tagata mo lenei malaga ma le feau faapitoa. Na ia silafia lelei. Na ia folafola foi i luma o le tupu o Israelu. Ona ia toe foi lea i se isi ala e ese, e tusa ma faatonuga na fai atu ai le Atua. Ma e oo mai iinei, o loo usitai pea le tagata o le Atua, o loo ia faia e tusa ma poloaiga na tuu atu. Ma o iinei e suia ai laasaga o le tala e le'i mafauaina.

Sa i ai se isi perofeta matua i Peteli. Na pau le faamatalaga a le Tusi, **o le perofeta ua toeaina.** Na o atu lana fanau ma talatala atu ia te ia mea uma na la'ua vaai o faia: o upu na fai atu ai le tagata o le Atua, o le ita o le tupu ma lana faatonuga ia pu'e ma saisai le tagata, o le vaeveaina o le fata faitaulaga ma le masa'a ifo ai o le lefulefu, o le malō ai o le lima o le tupu, o lana aioi i le tagata o le Atua mo le faamalologa o lona lima, ma le vavega na fai na toe lelei ai le lima o le tupu. Na fesili le perofeta toeaina i ona atalii po o fea le itu na alu ai le tagata o le Atua, ma la'ua faasino atu ai.

Ona faia lea e le perofeta toeaina o se mea e lē o faamatalaina auiliili mai. Na ia faanofoa lana asini ma alu e saili le tagata o le Atua. Na maua atu o ia o nofo i lalo o le aoa i autafa o le auala, ma fesili poo ia lea le tagata o le Atua na sau mai luta. Na tali atu le tagata o ia lava lea. Ona valaaulia lea o ia e le perofeta toeaina la te o i lona fale e 'ai sina mea'ai ma inu.

Na tali le tagata o le Atua e pei lava ona ia tali atu ia Ierepoamo. Na te lē mafai ona talia le valaau, ona sa poloaiina o ia e le Atua e 'aia le 'ai pe inu i lea mea, 'aia foi le toe foi atu i luta i le auala na sau ai. Ma o iinei e atili ai ona faanenefu. Na tali atu le perofeta toeaina, o ia foi o le isi perofeta, ma na fa'aali atu le agelu ia te ia ma ta'u atu le upu a le Atua, ina ia ta'ita'i atu o ia i lona fale ina ia 'ai ma inu. Ona fai mai lea o le upu o faamauiina, o se upu e lē mafai ona tu'u māmāina - *“¹⁸A ua tala pepelo o ia ia te ia.”*

E manino lelei le gagana Eperu, i le upu tonu o loo fa'aoga i isi vaega o le Tusi faasino i le taufaasesē fuafuaina lelei. E leai se tau faaletonu o le uiga iinei. E lē o mana'o le tusitala ina ia faaluafesasi le tagata faitau. O le perofeta toeaina na ia faufau le taufaasesē ma fatu le tala faasino i le fa'aaliga a le agelu. A e na talitoni i ai le tagata o le Atua. Na ia toe foi. Na ia 'ai, ma na ia inu. Na ia solia uma poloaiga e tolu, e le'i leva atu ona ia ta'utino leotele i luma o le tupu o Israelu ia Ierepoamo. O le mea na tupu a o la talisua i lona aso, o se mea e tulaga ese mai nisi tala faaperofeta. A o fai le talisua, na afio ifo le agaga o le Atua i luga o le perofeta toeaina – le perofeta na se'i faato'a tala pepelo nei lava ina ia aumai le tagata i lona fale – ma tautala mai ai o ia i le faamasinoga faasino i lana malo, le tagata o le Atua. Na ia fai atu i ai, talu ai ona ua ia soli le poloaiga a le Atua, talu ai ona ua ia toe foi mai, ua 'ai ma ua inu i le nofoaga na faasa ai o ia, o le mea lea, o le a lē tanumia o ia i tuugamau o ona tamā.

O lona valaoga sa faataunuaina i le auala a o ia toe foi atu, ina ua alu ane se leona ma faaumatia o ia. O le faamatalaga auiliili o lenei faalavelave, e avea ai o se taimi tulaga ese faamataupu silisili - e lē o le oti o le tagata, a o le faamatalaga mulimuli ane, i le asini ma le leona. O le asini a le tagata o loo tu ai pea lava i ona tafatafa. E faapea foi le leona o loo tu ai foi i autafa. E leai se manu sa gaiōi. E ui ina o asini e ausulusulu ma sosola mamao pe a vaai i leona; e ui foi ina o leona latou te lē tuua se tino ua mate aunoa ma le saeia, a ua leai se gaiōiga a nei manu e fai, na o le tutū ai pei e leoleo ma matamata, o se vaaiga e lē tusa ma le natura o mea.

Ina ua faalogo le perofeta toeaina i le mea ua tupu, na ia alu atu ma aumai le tino maliu o le tagata o le

Atua, ma tanumia i lona lava tuugamau. Na ia tagitu'i ia te ia, ma ta'ua o lona uso, "*Aue lo'u uso e!*" Ona ia faia lea o se isi foi mea e faaopopo i le lavelave o lenei tala. Na ia faatonu ona atalii, pe afai e oti o ia, ia tanumia o ia i le tuugamau faatasi ma le tagata o le Atua, ia tuu ona ivi i tafatafa o ivi o le tagata, auā e taunuu lava le upu na valoia e lenei tagata faasino i fata faitaulaga i Peteli ma mea maua i luga o le malo o Isaraelu, o loo i ai i aai o Samaria. O le perofeta toeaina na tala pepelo ina ia maileia ai le uso a perofeta, lea ua na toe mana'o la te taoto faatasi, atonu e fai lea mona lavea'i e puipui o ia mai le aso faamasino. O le upu moni na taunuu lava nei valoaga, i le tolu selau tausaga mulimuli ane, ina ua lepetia Peteli e le tupu o Iosia, ma na faatonuina tuugamau o ositaulaga sa auauna ai ina ia susunuina, a e faasaina ai ivi o ia perofeta e to'alua (2 Tupu 23: 17 – 18).

Mata o se taimi lelei lenei e taofi teisi ai, a e se'i fai le fesili tele na tauave mai i totonu o lenei tala mo le 3,000 tausaga talu ona tusia: Aisea na oti ai le tagata o le Atua mai Iuta? O le tali muamua lava e manino ma tuusa'o o loo aumai i le Tusi lava ia. Na ia oti ona o lona lē usitai. Na ia 'ai ma inu i le nofoaga na faasaina e le Atua. Peitai o lona tali, e ui ina o le tali manino mai le Tusi, a e na te faatupu se isi fesili loloto atu, e faigata ona lē amanaia – E faapefea ona faasalaina o ia i le lē usitai, ona o se mea e faavae i luga o le faufauga, taufaasesē ma le pelogia o ia? Sa le'i filifili lenei tagata e lē usitai ona o sona tu'inanau i se faamanuiaga, pe ona o sona fefe, pe ona o se fia maua o se saogalemu. A e na ia lē usitai, ona o se isi perofeta – o se isi auauna e pei o ia, e matua atu ia te ia, o se tagata la te tau fai agavaa uma i le punavai paia mai le Lagi, e fetalai mai i ai le Atua – le tagata na fai atu, e i ai le isi faatonuga fou mai le lagi? Na pelogia, faasesē, faatogafiti le tagata o le Atua, peitai na faia lava le faamasinoga ma le faai'uga na oti ai.

Mata o le itu lenei e avea ai lenei tala ma le mataupu ma ona fesili, e lavelave ma faigata ona tali; e olaola ai pea, ma avea ma lu'itau mo soo se tagata faatuatua i le Atua e alofa ma amiotonu. O le faamatalaga ma le faauigaina taatele o lenei tala e faapea, o le toilalo o le tagata o le Atua, e lē o lona 'ai ma inu i le nofoaga na faasaina ai o ia. A o lona toilalo, o lona taliaina o se isi fa'aaliga fou toe ese mai, e manino lona tuufaafegai, ma le uluai poloaiga na tuu sa'o atu ia te ia, e aunoa ma lona su'esu'e pe fesiligia lona

faamaoni; o se faamatalaga sa tataua lava ona ia masalomia ma fesiligia lona moni, a ona ua talafeagai lelei mo ia i lea taimi. O le uluai poloaiga na mai le Atua. Na manino lelei. Faigofie ma maoti. O le poloaiga fou, na mai se tagata ese, o ona tulaga faaperofeta sa le'i faamaonia, ese mai lana upu o ia foi o le perofeta. Na tauave e le tagata o le Atua le upu sa tataua ona ia taofi, i totonu o lona loto; peitai na ia filifili e faalogo, talia ma talitonu i se isi upu mai fafo atu, na ia manatu e sili atu lea upu nai lo le ulua'i poloaiga o i totonu o lona loto. O lenei faatatau, e lē na o se lape i le faiga filifiliga. A o se ituaiga faatinoga o le tuulafoa'iina o tiute e aumai faatasi ma le valaauina. O i latou uma ua valaauina ma tuu sa'o mai i ai ma faatonuga o tiute e fai, ua faapena foi ona tuu faatasi mai i ai ma le faatuatua, latou te taofi mau i nei poloaiga, ma puipui lelei i ai, mai le lamatia pe faaluafesasi e nisi upu ma nisi leo e ese mai, e tusa lava pe auala mai i foliga o le pule faalelotu, pe laei mai le malosia faaletapuaiga i le Atua.

E i ai foi se isi faitauga, e ui ina e itiiti ifo lona mafana a e tutusa lelei lona mauaa i le tala, e faasino i se isi tulaga. O le perofeta toeaina o Peteli na ola a'e i totonu o le faigamalo i matu, i le taimi atoa na fausia ai e Ierepoamo ana pulega ese faasagatau i le tapuaiga moni a Iutaia. Na ia ola faatasi ma perofeta pepelo ma fata faitaulaga e faasaina. Na ia tapua'i faatasi ai i le tapuaiga pepelo, aunoa ma sana gaioiga, aunoa se tula'i atu, leai se leo ma se upu faaperofeta, ina taofi ai nei faiga pi'opi'o ma faasagatau i le Atua.

Peitai ina ua taunuu mai le tagata o le Atua mai Iuta, ma na faia le galuega faaperofeta e le'i gaioi i ai lona perofeta toeaina, ona ia maileia lea ma faasesē, seia oo ina oti le tagata mai Iuta. E i ai i latou e faitau ma faaliliuina lenei mea, e sili atu nai lo se taliga malo faaseseina. Latou te vaaia i le perofeta toeaina, se tasi ua lagonaina, le faailoa manino o lona lē faia o lana galuega faaperofeta, na faailoa e se tagata na alu atu, tulai atu ma tautala atu i luma o le tupu. Se tagata, pe na ia iloa pe leai, na manaomia lona pa'ū ifo ina ia ufiufi ai le mataga o lona ia gūgū e lē tautala atu. E lē o ta'ua mai e le Tusi lea tulaga, a e na te lē o tuuaunoaina foi. Ma o le aganuu o lona faauigaina, na ola ai i totonu o lenei faauigalua mo le tele o senituri. A o se mea e tasi e lē mafai e soo se faitauga ona lē amanaia, e faasino i le perofeta toeaina - e le'i i ai sona faasalaga...(fa'aauau itulau 15...)

ITULAU MO FANAU & TUPULAGA TALAVOU

IA E ILOA LELEI O OE LAVA

Na maua e se tasi faifaatoaga se tama'i aeto i le vaomatua, ona ia aumaia lea i lona aiga ma tasi faalelei ai faatasi ma lana lafu moa ma lana lafu pīpī. Na ola ma tupu faatasi a'e ai lenei aeto, ua pei o isi manu o le fagaga. O lona lima o tausaga mulimuli ane, na asiasi atu ai se alii su'esu'e ma poto faapitoa i laau ma manu ma le natura o le siosiomaga. Na ia vaiaia ai le aeto, ona amata lea ona fai le la finauga. "O le aeto le manu lena, e lē o se moa po o se pīpī!" na fai atu ai le tagata asiasi.

"Ioe, e sa'o lelei oe," na fai atu ai le faifaatoaga, "a ua ou tausia o ia e avea ma moa."

"O ona apaau e oo atu le uumi i le sefululima futu. O le aeto moni lava!" na finau atu ai le asiasi.

"Ioe, e moni lava oe, peita'i e lē mafai ona ia lele mamao ese, ina ua ola nei e pei o se moa."

Sa faapena lava ona fai le finauga, se'ia oo ina la malilie e fai le faatinoga e saili ai le sa'o.

Na si'i i luga e le tagata asiasi le aeto ma fai atu i ai, "O oe o le aeto; o oe e te nofo i le vanimonimo a e lē o lalo iinei; ina tatala ia ou apaau ma lele ese atu."

Na vaai atu le aeto i le lafu moa ma le lafu pīpī, ona oso ifo lea i lalo, mai lima o le tagata.

O le aso na sosoo ai, na ave ai e le tagata asiasi le aeto i luga o le fale, ma fai atu i ai le upu e pei sa fai ananafi, ona tuu atu lea o le aeto e lele. Peitai, na vaai ifo le aeto i lalo i le lafu moa ma le lafu pīpī, ona faapepepepe lea ma alu ifo i lalo i le fagaga e aai faatasi ai.

"O le a toe taumafai tasi lava," na fai atu ai le tagata asiasi. Ona ia ave lea o le aeto i luga o le mauga. Ua vaavaai solo le aeto ma le gatete, ua lē iloa atu le lafu moa ma pīpī. Ona tago lea o le tagata asiasi ua faasaga mata o le aeto i le la, ina ia pupula o ia i le la. Ma a o fai atu e le tagata lana upu i le aeto, O oe o le aeto..., na faateia o ia i le matala o apaau lautetele o le aeto, ua tagi leo tele, ona lele mamao ese lea, e le'i toe foi mai. Ua iloa e le aeto, o ia lava o le aeto a e lē se moa po o se pīpī. Ina ua oo o ia i le nofoaga o aeto – le maua luga o le vanimonimo. Ina ua ia vaai i le la, a e le'i segaia ai ona mata.

Tupulaga e, ia e iloa tonu o oe na faia e le Atua, ma ua valaauina oe ia pei o Ia. Ia foliga ia te Ia, i le amio ia lelei, i le itu faaleagaga. E faigofie ona e iloa lea mea, ina ua sa'o le nofoaga ma le siosiomaga e te ola ai, ua sa'o tagata tou te mafuta ma militino faatasi, i a'oga ma falefaigaluega ma aulotu. Ina ua taula'i

lau vaai i le Tusi Paia e faitau, aemaise ia vaavaai pea ia Iesu lou Alii Faaola.

"¹⁰Auā o lana lava galuega i tatou, na faia i tatou ia Keriso Iesu, ina ia faia galuega lelei, na saunia anamua e le Atua, ina ia tatou savavali ai." Efeso 2.

Ua tele ma vave suiga o nei aso; ua tele faaosoosoga ma mailei a le fili e faaleaga ai outou, e tata'i ese outou mai le manuia moni. Ia outou mataala i taimi uma, aua o le ituaso tou te faatamala ai, e faafuase'i ona pu'ea e le tiapolo ma faaleaga. Ia ola ia Keriso i taimi uma. Ia outou manuia.

A I AI LE LOTO, E I AI LE AUALA

O le amataga o le vaitau 1950, na faamalolo mai ai le alii talavou o Euini Rosapeka (*Irwin W. Rosenberg*), mai ona tiute faaofisa o le fuamanuao a Amerika, ina ua lipotia ua maua o ia i le ma'i o le kanesa – o tulaga masani o tulafono o le fuāva'a. Na iloga le afaina o le soifua o lenei talavou ona o lenei motusia ai o lana galuega sa faalagolago i ai, peitai sa ia taula'i ma naunau ina ia toe maua lona maloloina i le tino faapea lana galuega. O lona faatuatua na ia finau ai e tete'e atu i le faama'i o le a pulea lona tino. E i ai se taimi na faapea atu ai famai, e toe lua vaiaso o totoe o lona ola, peitai o lona finau na i'u ai lava ina faamaloloina lona kanesa.

Ona faasaga lea o Euini e finau mo le toe maua mai o lana galuega sa i ai. Ui i lea, na ia maua mulimuli ane, o aiaiga ma tulafono o le neivi, e le mafai ona toe faafaigaluegaina se tasi e faamalolo ona o le gasegase o le kanesa. Sa ia taumafai pea, a o le toatele o tagata sa fai ane e leai se avanoa mo lona faamoemoe. Na fai atu se tasi o ana uo, "E sili ona taatia. Seiloga e fai se tulafono a le Malo ona faato'ā mafai lea ona toe talia oe." Ma o le tala lena na ta'u atu ia te ia le mea e fai – o le a ia saili ia fai se tulafono a le Malo.

Ma o le mae'a ai o le tele o masina o ia tu'itu'i faitoto'a, e saili solo, fai talosaga, faatalanoa ma faatauanau, ui atu i soo se auala faatulafono, na sainia ai loa e le Peresetene o Amerika ia Tulumane (*President Truman*) se tulafono faapitoa, e faatagaina ai Euini ina ia toe galue i le fuamanuao. E te silafia le mea na tupu? Na i'u lava ina ausia e ia le tulaga maua luga o le Atimalala (*rear admiral*) i le vaega lona Fitu o le Fuamanuao a le Unaita Setete o Amerika (*United States Seventh Fleet*).

E faamanatu mai le muagagana masani, “O le mea e i ai le loto, e i ai foi le auala e fai ai.” Pe afai o ia te oe le faatuatua e lē maluelue, ma o lou faamoemoe e laina tutusa ma le finagalo o le Atua, ona leai lea o se mea e faigata ia te Ia, na te lagolago ma fesoasoani, e faamanuia ma faataunuu au miti. ³⁵*O le mea lea ‘aia le lafoai ai lo outou loto tele, auā ua i ai le tau i tele.* ³⁶*Auā ua aogā ia te outou le onosai, ina ia maua e outou le mea na folafolaina, pe a uma ona faia e outou le finagalo o le Atua.” Eperu 10.*

AVEESE APPS TUAI, FAAPIPI’I APPS FOU

O le faasolo atu i le faai’uga o le senituri sefuluiva, na maua ai e le foma’i Rusia e suafa ia Ivan Pavlov le Faailoga aloaia o le Nopela (Nobel Prize), ona o lona atamai i lana su’esu’ega i ta’ifau. E tutusa uma soo se ituaiga taifau – e tafe o latou faua i autafa o mea’ai. Peitai na mana’o Pavlov e saili, pe faamata e mafai ona faatosina ma faatafe le faua o taifau, e se isi malosi ese (stimulus) nai lo mea’ai. Ona ia faia lea o le logo e ta muamua, ina ia valaau ai taifau a e le’i fafagaina i latou. Ma na i’u lava ina aveai le ta o le logo, ma malosi e faatafe ai faua o le meaola, tusa lava pe le’i sosogi pe vaai i se mea’ai.

Ua mae’a ona faatulaga o tatou lagona i le olaga atoa, pe tatou te iloa pe leai foi. O le tele o a tatou amio ma uiga e faatonutonu mai e ia faalogona (reflexes). O nisi e faigofie lava ma ua masani ai. O nisi lagona e faigata ma e matautia, e pei o le seiloga e inu ‘ava oona ona faato’a galo lea o ni tiga ma popolega. Peitai, pe tatou te iloa pe leai, pe saogalemu pe lamatia ai le ola, e tasi le mea ua mautinoa: e sili atu ona tele ma lavelave le faatulagaga o lo tatou ola, nai lo le tatou malamalama i ai.

Tupulaga talavou, ua outou masani ma auala faatekonolosi, i le faapipi’iina ma le toe aveeseina, o polokalame i luga o a outou laau komepiuta ma telefoni (*installing and uninstalling apps*). O se tasi vaega o le tatou tuputupu a’e faaleagaga, o le toe faatulagaina lea e le alofa tunoa o le Atua. Na fetalai Iesu, “*Ua outou faalogo na fai mai e anamua...A ou te fai atu a’u ia te outou.*” Na fa’aaoga soo e Iesu lena muagagana i lana lauga i

luga o le mauga. O le a le uiga o lea mea? Na la aveseina polokalame tuai o le Feagaiga Tuai (*uninstalling Old Testament apps*), ma faapipi’i ai polokalame fou (*installing New Testament apps*). Ua le toe “mata i le mata”, pe “nifo i le nifo”; a ua upgrade/siitia le tulaga e Iesu i le “*Ai se po mai i lou alafau taumatau, ia e liliu atu ia te ia le isi.*” Mataio 5:38-39. O lena faiga, e manaomia ai le toe fetuutuunai o faalogona. O nisi taimi e sili atu ona faigofie le fai o le gaioiga faa Kerisiano, nai lo le toe tali atu i ai o se isi gaioiga (Sometimes it’s much easier to act like a Christian, than to react like one.) E faapefea ona tupu lena suiga i la tatou toe tali atu? E ala i le Agaga Paia. ¹⁸*A o i tatou uma, o loo vaavaai i tatou i le pupula o le Alii ma o tatou mata, e le ufitia, ua liua ai i tatou ua foliga i ai nai le pupula e oo i le pupula, faapei ona maua ai mai le Alii, o la o le Agaga.”* 2 Kori.3. **Upgrade nei loa lou olaga, i le Ola ia Keriso app.**

SAILI+TATALO+TALITONU=MANUIA

O le alii pese fai musika ta’uta’ua o Randy Travis ma lana faia’oga/paaga o Lib, la te manatua lelei aso leaga o lona taumafai – e atoa le 3,650 lona aofa’i. E sefulu tausaga o taumafai le tamaita’i o Lib i soo se auala, e tatala faasoloatoa lona fale kalapu o faafiafia ai Randy, ina ia ulufale atu se isi ma faalogo i ana pese ma tulei ai ia manuia. A o le vaega a Randy e fai, pe a lē pese, e falai i’a e faatau ma faamamā ipu. Ona te’i lea ua maua le avanoa, ma suia ai mea uma. O lana pese e ta’ua o le “*On the other hand*” sa fiafia i ai tagata ma faatau, ua fai lana konekarate, ua alu ana malaga taamilo, ma ana ata tifaga. Ua maoa’e ma ta’uta’ua! Na ta’ua e tagata peiseai o se manuia faavavevave.

Peitai o le faamatalaina e Randy i lona manatua: “Na teena soo i ma’ua e i latou e pu’eina pese ma faatau i Nashville. Peitai o a’u o le tagata e talitonu, afai e te galue i se faamoemoe mo se taimi umi, ma talitonu pea lava, e le pine ona taunuu lea.” Na i’u ina aveai Randy o se tagata Amerika lauiloa i le musika, na ia maua faatolu le faailoga manumalo o le Grammys, ma le fitu faailoga i le Dove Awards, ma faaeaina i le Country Music Hall of Fame. Peitai e le’i maua vave pe faigofie nei faamanuiaga. Peitai na maua i lona finau ma galue malosi, na tumau lona talitonu ma faatuatua i taimi faigata, na faatuatua i le Atua ina ia

alofa ma fesoasoani ia te ia. O le a'oa'oga a Iesu, *"²⁴O le mea lea ou te fai atu ai ia te outou, o mea uma lava tou te ole mai ai ia outou tatalo, ina faatuatua ia o le a maua e outou, ona faia lava lea mo outou."* Mareko 11. Ma le isi lenei mea ia tuu pea i lou mafaufau: E tupu i le taimi a le Atua, e tusa ma Lana polokalame faasolo. O le tatou vaega e fai, o le galue ma tatalo, ma saga savavali pea i le faatuatua ma talitonu ia te Ia na te faataunuuina lava. Saili+galue+tatalo+talitonu= faamanuiaina & faataunuuina. Ma toe faafoi le viiga ia te Ia.

E LEOLEO OE E ANA AGELU

Sa i ai se faiaoga polofesa mai Amerika e igoa ia Hermilo Jasso, na ia ave lana vasega mo se asiasiga i Saina i le tausaga 2007. Ua mavae nai aso ona oso lea o le gasegase o le faiaoga, o lona manava sa lagona le tiga tutui tele, ma faanatinati ai loa i se falema'i lata ane. O se falema'i itiiti i se aai itiiti ma o le alii fomaini sa tiute ai, na ia iloa o le au'ona o le polofesa ua masae, ma ua amata ona salalau le 'ona i lona tino. Peitai ona sa leai se foma'i tipitipi i lea falema'i, sa faigata ona maua se togafiti; sa matua tigaina le faiaoga ma oo ina matapogia ua le toe iloa se mea. O le taimi lava lea i lona nuu i Amerika, sa ta'ita'i ai e lona tamā o le faifeau le sauniga lotu, ma na ia lagona peisea'i o i ai se mea o tupu i lona atalii a o i ai i Saina. Na ia fai atu i le aulotu, "Se'i faatali teisi le tatou lotu, a e tatou tatalo faapitoa muamua mo lo'u atalii o loo i Saina. O loo i ai se faalavelave."

O le ta o le lua i le tulua o po ma ao, na faafuase'i ai ona savali atu i totonu o le potu o le falema'i, se tasi o foma'i tipitipi lauiloa – o le fomaini e masani ona malaga ma le Peresetene o Amerika pe a asiasi i Saina. Na faateia le aufaigaluega o le falemai, a e na fai atu lenei alii, "Na ou sau e fai le taotoga o le Amerika." Na fai le taotoga ma toe malosai ai le alii polofesa. O le aso na sosoo ai, na fesili atu ai le foma'i tipitipi i le polofesa, "O ai tagata e toalu ia na e auina atu i lo'u ofisa ananafi?" Na tali le polofesa, "Ou te le'i auina atu nisi ia te oe. O a'u ou te le iloa ma se tagata iinei i Saina." Fai mai le fomaini, "O se mea tulaga ese lenei, auā na fai mai ia tagata, o oe o se tagata tāua ma aogā, ma e tatau ona ou faavave mai e fai lou taotoga." O le afioga a le Atua, *"¹Auā e poloa'i atu ia i ana agelu ia te oe, e tausii ia te oe i ou ala uma."* Salamo 91. 'Aua nei galo, o loo talosia outou e matua i taimi uma. **F. Tolua**

FILIFILIGA FAITOATASI A LE ATUA **(mai le itulau 8)**

ona o lona manatu alofa i tagata o lona nuu o ivi toto ma aano, a e paga lea, ua latou teena o Iesu, o Ia le Mesia na valoia e o latou perofeta, o Ia le taunuuga o lo latou filifilia, e fai ma nuu o le Atua. Mata o le isi foi lea mafuaaga o le teena e Isaraelu o le tulaga faa-Mesia o Iesu - ona e le o se Mesia na o Isaraelu, a o le Keriso Faaola mo isi tagata ese e le ni Isaraelu. O le malosai o le manatu faapitoa, ua latou melea ai lo latou manuia faapitoa, na filifilia ai mai le amataga.

A o se feau foi lea mo i tatou, o isi foi tagata o nuu ese. Ua filifilia i tatou tagata agasala, sa faapaupau, a ua valaauina i le alofa tunoa o le Atua, e fai mona nuu, o lana ekalesia, e faaolaina i le maliu ma le toetu o lona Alo pele e toatasi. A o se avanoa foi mo tatou e ofoina atu ai le soifua ma le ola, e fai mana meafaigaluega, e ola ai nisi tagata, ma faasalalau le tala o le faaolataga. I tiute masani o aso taitasi, ma feau faapitoa o le Malo Keriso.

O filifiliga faitoatasi a le Atua. E le o toe po malae, o lenei le mataupu o fai ma toatuga i totonu o si o tatou atunuu - le mataupu i tofiga ma faiga filifiliga. Amata mai i totonu o aiga ma afioaga. O loo molimau le tele o faamasinoga, ona o tofiga o suafa, fanua ma measina a aiga ma nuu. Ua lē maua ai se nofo lelei ma se filemu, a e na o le fefulituaa'i, ona o le tu'inaanu i ai. E faapea i lo tatou atunuu ma totonu o lana faigamalo i nei augatupulaga. O lo o faagasolo pea faiga filifiliga ma faamasinoga e oo mai nei, i le sailiga o taitai o le atunuu. O le mataupu ua lē maua ai se nofo lelei o tatou tagata, ua fevaevaea'i, fefulituaa'i, fefaamasino'a'i, o le tau o le pua ma lafo, faaleaga atu, faamanu'a mai, ma fa'aaoga ai upu matagā ma le gagana inosia.

E i ai nisi ta'ita'i, peiseai o latou faiva manaia ia, ma latou fatuaiga tausii faapitoa - o le fesiligia o le filifiliga faitoatasi a le Atua; e saili ia faaleaogā tofiga a le Atua; e faataute'e i e ua valaauina e le Atua; ua fai ma latou auupega le faafinau, e fesiligia, ma lu'i soo se filifiliga, ua fulisia i ai le faatofalaiga a le malo, o le atunuu, e auala mai ai le filifiliga fai toatasi a le Atua. Ua uia soo se auala, pe faaletulafono po o auala pi'opi'o, o le togi tupe o faamasino ma molimau pepelo, fa'aaoga le aisa ma fualaa faasaina, e faatau ma ia faataunuu ai a latou togafiti leaga. Paga lava!

A e lē o se mea fou lea, auā mai lava i aso o Farao, ma le tele o isi tupu ma ta'ita'i o malo, sa latou faataute'e i fuafuaga na filifilia e le Atua, o mea lelei mo lona nuu ma manuia atu ai ma le lalolagi atoa. Ua oo mai nei lava, i nisi o ta'ita'i o lo tatou atunuu, ua soo se mea lelei ua latou avea ma mea leaga; o mea mamā ma mea amiotonu, e oo i mea e sa ma paia, o mea e manuia ai tagata lautele, ua oo i ai lo latou ma'ema'e e tete'e. E saga faama'a'aina e le Atua o latou loto, seia oo ina fai ai e le Atua o vavega ofoofogia, e faapupula i ai o latou fofoga; a liliuina ai o latou loto, fai lena ma viiga o le Atua, a e afai e leai, o lo latou lava faamasinoga ma le i'uga lena.

O se faamanatu mai foi i la tatou Ekalesia, i le nofo a Aulotu, Pulega ma Matagaluega e oo lava i le Ekalesia Aoao, i lenei lava mataupu o faiga filifiliga, faasino i tulaga tofi. E pei o tofiga faa sui o Matagaluega i Komiti a le Ekalesia, o tofiga faa-Ta'ita'ifono ma Failautusi o Komiti, o tofi Toeaina pe Failautusi i Pulega ma Matagaluega. E moni o tofiga uma e mai le Atua; a ua i ai foi nisi ua latou uia nisi auala faatosina, latou te maua ai tofi, ma faapea ane o le finagalo lea o le Atua. O nisi foi ua manu'a loto pe a le filifilia, ma taumafai ai e faaleaga tofiga ua fai e le Atua. Auā e manifiini lava le laina, e va ai le eseese o le fia tautua ma auauna pea, ia saga auauna atili – ma le mana'o tele, le tu'inaanu ma le manatu faapito. Ne'i manatu se tasi e taofiofi tofiga a le Atua na o ia, a o toatele nisi uso e agavaa foi i latou i lea valaauina. E iloa gofie fua faaleagaga o le soifua faatuatua. Auā o fua o le Agaga o le Atua, e aofia ai le alofa, le loto maulalo, e amanaia ai le isi uso a auauna, ma faasafua tutusa i ai meaalofo a le Atua. E tuufaafegai lea, ma le faaloloto mana'o lasi i le paoa, le mamalu ma le tamaoiga, tupu ai le faalialia vale, ma le loto faafefeteina. ***E lē mai lē ua mana'o, e lē mai lē ua tausiniō, a e mai le Atua e ona le alofa.***

Ua faamanatu mai foi e lenei mataupu lo tatou valaauina, ma la tatou tali atu i le loto faafetai i lona alofa mai. Ua tatou savalia nei le 'afa lona lua o le tausaga, ma ua vaavaai atu i galuega faai'u o le 2026, e tauluga i osiga taulaga masani – Taulaga Nuū Ese, Taulaga Samoa, Au Taumafai ma Au Leoleo. Ina ia tatou faia mo le Atua e ala i Lana Ekalesia, e pei ona ua la muamua faia mo i tatou – i Lana filifiliga faitoatasi, na fasia ai Lona Alo pele, o le Taulaga e tasi a e afe, e paia, e lelei ma atoatoa, e lē mafaitaulia lona aofa'i. Ia tumau ia te la le viiga e faavavau.

Faitoaga Tolua FS.

O I'A MAI LE UPEGA (mai le itulau 11)

A o se mea e tasi e lē mafai e soo se faitauga ona lē amana'ia, o le perofeta toeaina, e le'i i ai sona faasalaga. Na ia ola faatasi ma tuatuaia o mea na ia fai, na ia tanumia le tagata na mafua ona oti ona o ia, na ia ta'ua o lona uso, na ia tagi i ona luga. Atonu ua lava lena. Atonu foi e lē lava. E faalagolago i le ituaiga amiotonu e te manatu o loo taumafai le Tusi e momoli mai. O le tala e tumau i faamaumauga, na talitonu le perofeta toeaina i valoaga a le tagata na ia faaleagaina – o lona talitonu maumaututu na ia mana'o ai e taoto faatasi ma ona ivi pe a oti o ia. O i ai se maitauga mulimuli ane, o loo taoto e aunoa ma se tala a le Tusi, peisea'i o le sālō e sili atu ona leotele nai lo se faamatalaga e fai i ai.

A e faapefea le tagata o le Atua? Na ia taunuu atu, faatino le feau na faatonu e fai, tautala atu se valoaga e 300 tausaga faato'a taunuu; na ia teena le valaaulia a se tupu malos, a e mulimuli ane ua toilalo i se valaaulia a se isi toeaina la te lē masani, e le'i faamaonia lana mau i lona tofi faaperofeta. O lena faalēpaleni – le tete'e atu i le pule aliali manino mai, ma le faigofie ona faasesēina e se isi tofiga faafoliga faalelotu – o se tasi o maitauga faasaikolosi o loo aumaia e le tala, e ui ina e lē o sona lea faamoemoe. O nisi lu'itau ogaoga, e lē aumaia e tupu malolosi ma o latou lima faaloaloa (pei o Ierepoamo) e i ai a latou autau o sauni e osofai i soo se taimi. Peitai o nisi taimi o nei lu'itau e maua mai le siufofoga malū o tagata latou te tautala i lau gagana, latou te silafia tutusa upu ma tala e te saunoa ma fetalai i ai, e silafia lelei le gagana e fesoota'i atu ai, ina ia e seetia ma talitonu, e sau foi o ia mai le nofoaga ma le pule, e ana ulua'i faatonuga o i totonu ia te oe.

Mafaufau i lenei mea. Pe afai o oe o le tagata o le Atua sa i luga o lena auala, i le mae'a ai o mea uma na e faia ma vaai i ai, ua malō lepelā le lima o le tupu i lau valoaga, i le uma ai ona isilua le fata faitaulaga, ua faamaonia lau valoaga, a e mulimuli ane lua feiloai ma se isi tagata ese, e fai atu o ia foi o le isi perofeta e pei o oe, ma fai atu na ia maua se fa'aaliga, ma suia atoatoa ai faatonuga na uluai fai atu ia te oe, o le a sau tali i ai? E faapefea ona e mautinoa, e mafai ona e iloa le eseese o se leo fou mai fafo atu, e laei mai i le pule ma ofu mai i le mamalu, ua leva ona i ai i totonu ia te oe? O le fesili lena ua 3,000 tausaga talu ona tupu lenei tala, e le'i maua sona tali lelei ma faamalie gofie. Ma o le mea tonu lava lena o loo ola ai pea lenei tala, o afioga paia a le Atua e soifua pea e oo i le faavavau.

O le itu e tulaga ese ai lenei tala mai isi perofetaga ma tala faavaloaga i le Tusi Paia, e lē o lona i'uga mata'utia. A o le a'oa'oga o loo mamanuina i le tala atoa. E leai se tagata leaga po o se sifi o le ata (villain) e manumalo. E leai foi se tagata afaina fua (innocent victim) e mamā atoatoa. E leai se a'oa'oga e mafai ona e tusia i se laina se fuaiupu e tasi, aunoa ma le leiloa o se isi mea taua. O le tagata o le Atua na usitai, a e mulimuli ane ua le usitai. O le perofeta toeaina na pepelo, ona ia tagi lotulotu lea. Na lapataia lerepoamo a e na te le'i suia se mea e tasi, ma o lana pulega ma faiga tapuaiga na olaola ma fa'aauau pea i le malo i matu mo le tele o auga tupulaga. O le valoaga na taunuu lava, i le 300 tausaga mulimuli ane, i luga o ivi o ositaulaga ua leva ona maliliu mo le faitau senituri.

E lē o foia e le tala se fe'ese'eseaiga e tasi o loo ia tatalaina. O loo ia tuu ai pea faamatala – fuafuaina lelei, faamoemoeina lelei – o ai lava na te faitauina o le a ia ola ai i totonu o lona lē mautonu, nai lo lona taumafai e sola ese mai ai ma se tali vave faigofie. O le 3,000 tausaga mulimuli ane, talu ona uluai tusia lenei tala, o le finauga tele po o le a tonu lona uiga, o loo ola pea. I faaliliuga ma faauigaga faarapi, i lauga ma tusitusiga faamataupu silisili, i talanoaga ma faasoaga i le va o tagata faitau Tusi Paia e i ai le naunautaiga e a'oa'oina mai ai, e faasino i le tagata o le Atua na usitai, faataunuu lana misiona, na ia tete'e ma le leai o se fefe i se tupu malosia ma matautia, ma toilalo ma pa'ū i luma o se toeaina sa pepelo ma le mautinoa, o loo tumau pea o se tagata e lē o mafaia e le taimi ma auga tupulaga ona faamanino ma faauiga.

Ma atonu o le auala e sili ona faamaoni lea e malamalama ai, i le tuuina ma faamauiina ai o lenei tala i le Tusi Paia. O lona i ai, e lē ina ia aumai ia i tatou se tali mamā ma manino i faamasinoga amiotonu faalelagi e mafai ona tatou feavea'i solo ma le mafanafana, a e ia tatou ola faatasi ai ma le fesili, ma le faatuatuga o le nofoaga lea e tataua ona faamaui ai pea le tele o upu, tala ma mea moni - i le Tusi Paia.

O le loloto o le tala o faamauiina i le 1 Tupu 13 e avea ma se faata i le tulaga o le olaga o le tagata, faasino tonu i lo tatou faia ma sootaga i le pule ma tautinoga i totonu. O loo taafifili pea a'oa'o su'esu'e i le tala faasolopito, ma le malaia o le tagata o le

Atua. Pe o lona oti o faailoa ai le toasā o le Atua, pe o se lapataiga malosia i le mata'utia o le ave o le faamuamua i aafiaga mai fafo, nai lo mea loloto ma le moni faalelagi o teu i totonu? O loo valaauina e le tala nei feteenaiga. Na te le o teena le tulaga moni, o le tagata o le Atua na 'atoatoa' o lona usitai, seia oo i le taimi na afaina ai i mau pepelo o se pule 'fou' mai fafo atu.

Se'i tulimata'i laasaga o le faasologa o le taufaasesē. O le perofeta matua/toeaina o se fili lavelave. O lona valaauina o le tagata o le Atua ina ia tatala lona aso, e 'ai, ua na faamalosia ai le tagata e filifili i le faatonuga na uluai tuuina atu ia te ia, ma le faatonuga fou e feteenai ma le uluai poloaiga. O lona fai atu "*O a'u foi o le perofeta e pei o oe*", ua na faaliu auupegaina ai le tofi ma le tiute ua valaauina tutusa ai i la'ua uma. O le ituaiga metotia ma auala faasaikolosi lea ua faia faaonaponei, o le mea na tupu i le tala anamua. O loo faailoa manino ai o a tatou fetaia'iga e sili ona matautia, e lē o fesagaiga ma i latou e tete'e mai i o tatou talitonuga ma faatuatuga, peitai o fesagaiga ma i latou e fai mai tatou te faasoa tutusa, a o loo taumafai e tata'i ese i tatou mai o tatou faamoemoea lelei.

E lē gata i lea, a o le faamauiina tumau o ona tuatuagia e fai lava sona maoa'e. O le tagata o le Atua e le'i tuuina i ai se "avanoa lona lua" i le faasologa o lona soifuaga i lea lava taimi. Na oti o ia, ma o lona talaaga ua faapipii atu i le nofoaga, mata sa ia naunau e 'alofia mai lona ta'ufaatasia ai. O lenei faamaui tumau ua fesoasoani e faateleina le aafiaga o lana faiga filifiliga. Na te faamalosia le tagata faitau ina ia na faafeiloai le moni, o nisi o faiga filifiliga e i ai ona tuatuagia e lē mafai ona toe suia pe toe iloilo. O lona mata'utia faauigalua, ona o lona oti ua peisea'i e faamaonia ai le tulaga paia o le perofeta, na fai moni toilalo ma auala mai ai lona malaia. O le asini ma le leona sa avea e fai ma molimau gūgū – o "leoleo o le mata'aga" – o se isi vaaiga ua fai ma taufaamata'u i le au su'esu'e ma le 'au faamatala uiga loloto mo le tele o meleniuma. Na te faatupu manatu i fuafuaga faalelagi e lē ausia e le mafaufau o le tagata ma faalelagi. O le tulaga i le lē faa'umatia e le leona o le tino o le tagata, ma le lē sola ese o le asini mai autafa o le leona, o loo faailoa mai ai e lē o se mea masani i le natura o manu, a o se sauniga paia ma le mata'utia o le faamasinoga. Ua faailogaina ai lea nofoaga o le eleele e sā ma paia...

(sosoo atu i le Sulu Samoa Aokuso 2026)